

亳州志

22.6523
0032.073
:8

Kodak Color Control Patches

亳州志卷十

封授正一品花翎四品銜升缺用亳州知州

職官志

名宦

漢

鄧顯未詳何處人爲廣漢太守陳寵主簿寵入朝帝問曰在


郡何以爲理寵謝曰臣任功曹王渙以簡賢選能主簿鄧顯

自補闕臣奉宣詔書而已帝大悅顯由此知名安帝時爲

刺史時天下饑荒競爲盜賊州界收捕且萬餘人顯愍

困窮自陷刑辟輒擅赦之因自劾奏有詔勿理後位至長

尉



楊秉字叔節宏農華陰人震仲子少傳父業受歐陽尚書明
京氏易博通羣書隱居教授年四十餘乃應辟拜侍御史出
爲豫州刺史由豫至譙計日受俸餘祿不入私門故吏遺錢
百萬閉門不受官至太尉朝廷有得失輒盡忠規諫上多改
容納焉

周景字仲嚮廬江舒人也少以廉能見稱以明學察孝廉辟
公府後爲豫州刺史辟汝南陳蕃爲別駕潁川李膺荀緄杜
密沛國朱寓爲從事皆天下英俊之士稍遷至尙書令遂登
太尉

陳蕃字仲舉汝南平輿人也祖河東太守蕃年十五常閒處

一室而庭宇蕪穢父友同郡薛勤來候之謂蕃曰孺子何不
灑掃以待賓客蕃曰大丈夫處世當掃除天下安事一室乎
勤知其有清世志甚奇之初仕郡舉孝廉除郎中遭母憂棄
官行服闋刺史周景辟別駕從事以諫爭不合投傳而去後
與竇武謀誅常侍王甫曹節爲害

李膺潁川襄城人性簡抗無所交接唯以同郡荀淑陳實爲
友初舉孝廉尋轉蜀郡太守修庠序設條教明法令威恩
並行蜀之珍玩不入於門朝廷舉能理劇轉烏桓校尉以公
事免官還居綸氏教授常千人苟爽嘗就謁膺因爲其御旣
還喜曰今日乃得御李君矣其見慕如此是時朝廷日亂綱

紀頹弛膺獨持風裁以聲名自高士有被其容接者名爲登龍門後以張儉事收捕鉤黨被害

杜密字周甫潁川陽城人也與李膺名行相次故時人亦稱杜焉坐黨事被徵自殺

王允字子師太原祈人也同郡郭林宗見而奇之曰王生一日千里王佐才也遂與定交少好大節有志於立功嘗誦習經傳朝夕試騎射三公並辟之以司徒高第爲侍御史中平元年黃巾賊起特選拜爲豫州刺史辟荀爽孔融等爲從事降賊數十萬初平元年代楊彪爲司徒及董卓遷都關中允悉斂蘭臺石室圖書秘緯要者以從至長安分別條上經籍

具存允有力焉矯情附卓扶持王室於危亂之中潛結卓將呂布刺殺卓卓將李傕郭汜陷長安城布招允去允曰若蒙社稷之靈上安家國吾之願也如其不獲則奉身以死之朝廷幼恃我而已臨難苟免吾不忍也努力謝關東諸公勤以社稷爲念侍帝側不去爲李傕等所害帝後思允忠節賜祕器殯葬之贈以本官

琬字子炎以才行舉爲魯東海二郡相有明畧所在稱神明又爲豫州牧時寇賊陸梁州境凋殘琬討擊平之威聲大震政績爲天下表徵爲司徒後以同王允討董卓李郭收琬下獄死

何夔字叔龍陳颍陽夏人也幼喪父與母兄居以孝友稱避
 難淮南袁術辟之不應然終為術所留術圍蕪陽以夔為詔
 人欲今說蕪陽夔謂謀臣李業曰昔柳下聞代國之謀而有
 憂色曰吾聞伐國不問仁人斯言何為而至於我哉遂匿瀕
 山魏王操辟為司空掾後出為城父令時東南多變諸縣皆
 以名士鎮之吏民稍定後為太子少傅文帝踐阼封成陽亭
 侯謚靖侯

魏

盧毓字子家涿郡涿人也父植有名於世毓以學行見稱文
 帝踐阼徙黃門侍郎出為濟陰相梁譙二郡太守帝以譙舊

鄉故大徙民充之以為屯田而譙土地磽瘠百姓窮困毓愍
 之上表徙民於梁國就沃衍失帝意雖聽毓所表心猶恨之
 遂左遷使將徙民為睢陽典農校尉毓心在利民躬自臨視
 擇居美田百姓賴之遷安平廣平太守所在有惠化進司空
 爵容城侯卒謚曰成崇祀本州名宦

徐邈字景山燕國薊人也太祖平河朔為東曹議令史時科
 禁酒而邈私飲至於沉醉校問以曹事邈曰中聖人太祖怒
 鮮于輔進曰平日醉客以酒清為聖人濁者為賢人邈性修
 真偶醉言耳坐免文帝時歷譙相卒謚穆侯身沒之後家無

一ノコ五

祖逖字士雅范陽道人少孤性豁蕩不修儀慷慨有節尚
年二十四與司空劉琨俱爲司州主簿情好綢繆共被同寢
中夜聞荒鷄聲因蹴琨起曰此非惡聲也因起舞元帝用爲
奮威將軍豫州刺史將部曲渡江中流擊楫而誓曰祖逖不
能清中原而濟者有如大江初北中郎劉演之距於石勒也
流人塢主張平樊雅等在譙演署平爲豫州刺史雅爲譙郡
太守又有董瞻于武謝浮等十餘部皆屬焉逖誘浮取平浮
斬平以獻逖進屯太邱樊雅遣衆夜襲逖軍督護董昭與戰
走之逖率衆追討遂克譙城蓬坡塢主陳川自號寧朔將軍

陳留太守遣將掠豫州諸郡大獲子女車馬逖遣將魏策邀
擊於谷水盡獲所掠者皆令歸本軍無私焉川懼降石勒勒
遣川還襄國留桃豹守川故城住西臺逖遣將韓潛等守東
臺同一大城賊開南門出入放牧逖軍開東門相守四旬胡
戍久軍饑宵遯石勒屯戍漸蹙黃河以南盡爲晉土逖克已
務施不蓄資產百姓感悅嘗置酒大會耆老中座流涕曰吾
等老矣更得父母死復何恨乃歌曰幸哉遺黎免俘虜三辰
旣朗遇慈父元酒忘勞甘瓠脯何以咏恩歌且舞其得人心
如此會朝廷將遣戴若思爲都督逖以己披荆棘收河南而
若思一旦雍容來據之意甚快且聞王敦內篡遂感激發病

卒於雍邱豫州士女若喪考妣譙梁百姓爲之立祠以祀之
贈車騎大將軍

桓宣譙國鉅人爲元帝丞相舍人時鳩主張平自稱豫州刺
史樊雅自稱譙郡太守各據一城帝以宣信厚且與平雅同
州里轉宣爲參軍使就平雅平雅遣主簿詣丞相府受節度
帝皆加四品將軍卽其所部使捍禦北方宣爲中州郎將參
軍頃之豫州刺史祖逖遣參軍殷乂詣平雅乂意輕平平大
怒於坐斬乂阻兵固守逖攻平殺之而雅據譙城逖求助於
王含含遣宣領兵五百助之逖謂宣曰卿先說平雅信義著
於彼今復爲我說雅雅若降者方相擢用不但免死而已宣

復單馬詣雅雅與宣置酒結友少日雅便自詣逖未幾石勒
別將圍譙含又遣宣率眾救逖未至而賊退逖留宣討諸未
服皆破之遷譙國內史卒贈鎮南將軍

陳頽字延思陳國苦縣人也少好學有文義州辟從事時解
結代楊準爲刺史問僚佐曰河北白壤膏梁何故少人士每
以三品爲中正頽答曰詩稱維嶽降神生甫及申夫英偉大
賢多出於山澤河北土平氣均蓬蒿才高二尺不足成林故
也結曰張彥真以爲汝穎巧辯恐不及青徐儒雅頽曰彥真
與元禮不協故設過言老子莊周生陳梁漢魏二祖起譙沛
準之眾州莫與爲比結甚異之曰豫州人士常半天下此言

非虛元帝時以薦遷鎮東行參軍事典法兵一曹以孤寒數
有奏議朝士惡之出除譙郡太守崇祀本州名宦

北魏

樊歡陳留人爲南兗州刺史阿陽侯屬高氏專權謀興復爲
高氏所誅

堯傑上黨長子人屬義兵起歸高歡爲都督率眾隨樊子鵠
討兀樹於譙城平之除南兗州刺史性果決吏民畏之

元子華字伏榮魏高涼王之裔襲爵艾陵伯初除齊州刺史
鞠獄務加仁恕齊人樹碑頌德孝靜初除南兗州刺史所在
有德惠

北齊

叱干苟生北齊時以儀同鎮南兗州周帝破鄴赦書至苟生
自縊死

北周

元景山字瑤岳洛陽人從武帝平齊以功拜大將軍平原郡
公治亳州總管先是州民王廻洛張季真聚結亡命每爲劫
盜前後牧守不能制景山下車遂捕之迴洛等奔江南擒其
黨數百人皆斬之法令明肅盜賊屏跡部內大清徵爲候正
宣帝嗣位從韋孝寬經畧淮南又以功拜亳州總管

伊婁謙字彥恭鮮卑人亳州總管隋高帝朝拜大將軍進公

爵後爲澤州刺史清約自處甚得人和以疾去職吏人攀戀
行數百里不絕

賀若誼字道機河南洛陽人性剛果有幹略魏直閣將軍大
都督仕周進位大將軍拜亳州總管馳驛赴部西過司馬消
難東距尉遲迴後拜靈州刺史

唐

張文琮貝州武城人好自寫書筆不釋手貞觀中爲治書侍
御史遷亳州刺史祀名宦

姚崇字元之陝州硤石人少倜儻尙氣節武后時諫羅織請
以一門百口保內外官無反者后悅賜銀千兩進爲鳳閣鸞

臺平章事張柬之謀誅一張后遷上陽宮王公相慶崇獨流
涕東之曰今豈涕泣時耶恐公禍由此始崇曰事天后久違
舊主而泣人臣忠節也由此獲罪甘心焉俄爲亳州刺史傳
稱其尤長吏治處決無淹思三爲宰相常兼兵部故屯戍斥
堠士馬儲械無不諳記封梁國公卒謚文獻祀州名宦
裴諝字士明絳州聞喜人代宋時爲河東租庸鹽鐵使入計
帝問權酷歲利出納幾何諝曰臣自河東來農人愁歎穀麥
未種臣謂陛下軫念元元先訪疾苦而乃責臣以利孟子言
治國者仁義而已何必曰利帝稱歎拜右司郎中出爲度州
刺史歷亳州刺史以寬厚和易爲治祀名宦

李繁京兆人鄴侯泌之子也敬宗時出爲亳州刺史州有劇賊他刺史不能擒繁有機畧悉知賊巢藪一旦出兵捕斬之議者責繁不先啟觀察府爲擅興詔侍御史舒元輿按之元輿與繁素隙盡翻其獄以爲濫殺無辜詔賜死人皆寃之繁知且死恐先人功業泯滅就吏求廢紙作家傳十篇行於世楊凝字懋功累官右司郎中宣武董晉表爲判官亳州刺史缺以行州事增墾田決汙堰築隄防水患以息王珣字伯玉并州人少舉進士以拔萃擢長安尉武后詢其族曰廢后臣之姑也后不悅左遷亳州司法參軍累遷工部侍郎終右散騎常侍卒贈戶部尚書謚曰孝祀名宦

崔渙博陵安平人元暉之孫博綜經術長於論議起家亳州司功參軍還調於是入判者千餘人吏部侍郎嚴挺之施特榻試彝樽銘謂曰子清廟之器故以相命後拜門下侍郎同中書門下平章事簡淡自處時望尤重嘗因進見慨然論元載奸由是貶道州刺史卒贈太子太傅謚曰元崇祀名宦張巡字巡鄆州南陽人博通羣書曉戰法開元末擢進士繇太子通事舍人出爲清河令更調眞源令天寶十五載正月賊酋張通晤陷宋曹等州譙郡太守楊萬石降賊逼巡爲長史使西迎賊軍巡卒吏哭元元皇帝祠遂起兵討賊每戰輒克至睢陽與太守許遠城父令姚閻等合乃遣將雷萬春南

霽雲等領兵戰甯陵北斬將二十殺萬餘人投尸於汴水爲
不流詔拜巡主客郎中副河南節度使至德二載祿山死慶
緒遣其下尹子琦功睢陽巡勵士固守二十戰氣不衰子琦
敗獲車馬牛羊悉分士卒秋毫無入其家者詔巡拜御史中
丞遠侍御史闡吏部郎中七月復圍城至是食盡士多餓死
存者皆瘵傷氣乏巡出愛妾曰諸君經年乏食而忠義不少
衰吾恨不割肌以啖眾甯惜一妾而坐視士饑乃殺以大響
坐者皆泣巡疆令食之遠亦殺奴僮以哺卒至羅雀掘鼠煮
鎧弩以食十月癸丑賊攻城士病不能戰巡西向拜曰孤城
備竭弗能全臣生不報陛下死爲鬼以厲賊城遂陷乃與姚

闡雷萬春等三十六人遇害巡年四十九天子下詔贈巡揚
州大都督贈妻申國夫人又贈遠荊州大都督姚闡潞州大
都督大中時圖巡遠霽雲像於凌煙閣節本傳

姚闡宰相崇從孫也性豪蕩好飲謔善絲竹厯壽安尉素善
張巡及爲城父令遂同守睢陽累加東平太守後死巡難德
宗朝贈潞州大都督官一子崇祀本州忠義祠

五代唐

高漢筠字時英厯山人長興中爲亳州刺史在亳三年歲以
己俸百千代納逋租斯亦近代之良二千石也舊五代史本傳

郭瓊平州盧龍人少以勇力事契丹後唐天成中挈其族來

歸以爲亳州團練使瓊雖起卒伍而所至有惠政尊禮儒士孜孜樂善蓋武臣之賢者也

晉

邊蔚字德昇長安人開運初出爲亳州防禦使爲政清肅亳民感之歲餘入爲戶部侍郎

漢

康景思秦州人也幼善角觝戲以屠狗爲生去爲軍卒遷指揮使降魏王繼岌拜興州刺史契丹滅晉拜亳州防禦使漢高祖時史宏肇用事喜告訐殺人景思奴嘗有所求不如意告景思與李景通而私畜兵甲宏肇遣吏往收景思曰我家

在此請索之有錢一千爲受外賂有甲一屬爲私畜兵吏索之惟一笥軍籍糧簿而已吏憫而寬景思請械送京師以自明景思既就道潁亳之人隨至京師共明之宏肇乃鞫其奴卽奏斬奴而釋景思後以戰傷重卒贈武清軍節度使

周

李瓊字子玉幽州人幼好學涉獵史傳唐莊宗募勇士卽應募與周祖等十人約爲兄弟周祖與瓊尤密嘗過瓊見其危坐讀書因問所讀何書瓊曰此闕外春秋所讀以正守國以奇用兵較存亡治亂記賢愚成敗皆在此也周祖令讀之謂瓊曰兄當教我廣順初拜將作充內作坊使賜金紫歷知陝

亳二州治郡寬簡民皆德之卒贈太子少師

陳思讓字後已幽州盧龍人晉天福中以功遷衛州刺史時武臣罕有執喪者思讓聞丁內外艱不候詔去郡奔喪聞者嘉之後顯德元年改亳州防禦使

劉熙古字義淳宋州寧陵人唐左僕射仁軌十一世孫熙古年十五通易詩書十九通春秋子史擢進士第周廣順中爲亳州防禦官熙古兼通陰陽象緯之術作續聿斯歌一卷六壬釋卦序例一卷歷代紀要十五卷切韻拾玉二篇

宋

郭廷謂字信成徐州彭城人周末亳州防禦史宋乾德二年

再知亳州

王德用字元輔其先真定人徙鄭州皇祐二年除集慶軍節度使封冀國公至和元年爲樞密使契丹使曰南朝以公使樞密而相富公可謂得人矣改封魯國公卒贈太尉中書令謚武恭

李顯忠綏德軍清澗人紹興三十二年授淮西制置使京畿河西淮北壽州亳州招討使加太尉主管侍衛軍馬司隆興間兼淮西招討使收復靈璧虹縣宿州欲遂取山東嘗曰吾向知亳州以恩信結其人頗見信重聞吾提兵而來必爲響應則不勞而下矣

譚延美大名朝城人雍熙四年任亳州防禦使端拱二年進
邕州觀察使判亳州

宋庠字公序開封雍邱人父杞爲應山令隨父僑寓安陸天
聖初進士第一累官翰林學士參知政事嘉祐中拜相封鄭
國公罷爲景靈宮使治平元年屢請老以使相判亳州以慎
靜爲治進位司空致任卒贈太尉謚文獻庠自應舉時與弟
祁以文學名擅天下儉約不好色聲讀書至老不倦善正訛
謬嘗校定國語撰補音三卷又輯紀年通譜區別正閏爲十
二卷掖垣叢志三卷別集四十卷崇祀名宦
富弼字彥國河南人舉茂才異等累官樞密副使夏竦不得

志中弼以飛語弼懼求宣撫河北還以資致殿學士移知青
州兼京東路安撫使河朔大水民流就食弼勸所部民出粟
益以官廩得公私廬舍十餘萬區散處其人以便薪水官吏
自前資待缺寄居者皆賦以祿使卽民所聚選老弱病瘠者
廩之仍書其勞約他日爲奏請受賞率五日輒遣人持酒肉
飯糧慰藉出於至誠人人爲盡力山林坡澤之利可資以生
者聽民採取死者爲叢塚明年麥大熟民各以遠近受糧歸
凡活五十餘萬人募爲兵者萬計帝聞之遣使褒勞拜禮部
侍郎弼曰此守臣職也辭不受前此救災者皆聚民城中爲
粥食之蒸爲疾疫反相踏藉或數日不得粥而仆名爲救之

而實殺之自弼立法簡便周盡天下傳以爲式召拜同中書門下平章事集賢殿大學士與文彥博並命宣制之日士大夫相慶於朝英宗立封祁國公進封鄭王安石用事雅不與弼合弼稱疾求退拜武寧軍節度使同中書門下平章事判亳州青苗法出弼以爲如是則財聚於上民散於下持不行願歸洛養疾許之加拜司空進封韓國公弼雖家居而朝廷大利害知無不言性至孝恭儉好修與人言必盡敬雖微官及布衣謁見皆與之亢禮氣色穆然不見喜愠其好善疾惡出於天資終身皆出於此卒贈太尉謚文忠崇祀名宦

楊大雅字子正錢塘人素好學日誦數萬言雖飲食不釋卷

官右諫議大夫集賢院學士出知亳州卒大雅樸學自信無所阿附過金陵遇風覆舟衣冠盡喪丁謂遣人遺衣一襲辭不受嘗因奏對上原治十七篇著有大隱集三十卷西垣集五卷職林二十卷兩漢博聞十二卷崇祀名宦

李垂字舜工聊城人咸平中登進士第累官著作郎上兵制將制及導河形勝書時論重之丁謂執政垂未嘗往謁謂其怙權恃勢必遊朱崖吾不欲在其黨中謂聞而惡之罷知亳州明道中還朝閣門祇候李康伯謂曰舜工文學議論高於天下諸公欲用爲制誥盍一往見相公垂曰我若昔謁丁崖州則乾興初已爲翰林學士矣今已老大安能趨炎附熱看

人眉睫以冀推輓乎執政知之出知均州

李防字周智大名內黃人舉進士先授忠武軍節度推官後遷祕書丞二浙民饑建言逃戶田宜召人耕種使不敢輕去畝畝而官賦常在還爲江淮轉運淮南舊不禁鹽防請禁而官鬻之兵夫載鹽江上多漂沒防請令商人入錢帛京師或輸芻糧西北邊而給以鹽皆采用之坐失舉免官後起通判徙知延宿亳三州防好建明利害所至必有論奏朝廷頗施行之在江南識晏殊於童子時薦之後至宰輔崇祀名宦李廸字復古其先趙郡人後徙濮州鄆城深厚有器局舉進士第一眞宗幸亳爲留守判官遂知亳州先是賊剽掠城邑

發兵捕之久不得廸知悉罷所發兵陰聽察知賊處部勒驍銳士擒賊斬以徇後擢司諫保護太子斤丁謂奸景祐中坐范諷姻黨罷爲刑部尙書再知亳州以太子太傅致仕謚文定帝篆其墓碑曰遺直祀名宦

張知白字用晦滄州清池人幼讀學中進士第王欽若爲相知白議論多失及欽若分司南京宰相丁謂惡欽若徙知自南京留守意其報怨知白待欽若加厚謂怒徙知亳州天聖三年加工部尙書平章事在相位惜名器無毫髮私常以盛滿爲戒雖貴顯清約如寒士卒謚文正崇祀名宦
宴殊字同叔撫州臨川人七歲能屬文張知白以神童薦擢

秘書省正字帝每訪殊以事率用方寸小紙細書已答奏輒并彙封上帝重其慎密太后聽政殊建言羣臣奏事者太后垂簾聽之改知應天府延范仲淹以教生徒五代以來興學自殊始以禮部尙書罷知亳州性剛簡累典州吏民頗畏其愾急善知人富弼楊察皆其婿也平居好賢當世知名之士如范仲淹孔道輔皆出其門及爲相益務進賢材而仲淹韓琦皆進用至於臺閣卒贈司空兼侍中謚元獻帝篆其碑首曰舊學之碑崇祀名宦

韓億字宗魏真定人徙開封舉進士累官龍圖閣待制天聖中使契丹時副使者章獻外姻也妄傳太后旨於契丹論以

南北歡好傳示子孫之意億初不知也契丹主問億皇太后卽有旨大使何不言億對曰本朝每遣使必以此戒之非欲達於北朝也契丹主大喜曰此兩朝生靈之福也人謂副使失辭而億更以爲恩意甚推美之知亳州後於寶元元年以資政殿學士知成德軍復知亳州崇祀名宦

宋祁字子京宋庠之弟累官給事中兼龍圖閣學士坐其子從張彥方遊出知亳州兼集賢殿修撰唐書成遷工部尙書翰林學士承旨卒謚景文修唐書十餘年自守亳州出入內外嘗以彙自隨爲列傳百五十卷預修籍田記大樂圖二卷文集百卷所至治事明峻好作條教崇祀名宦

王洙應天宋城人中甲科仁宗朝由工部員外郎出知濠州徙知亳州後爲翰林侍讀學士洙汎覽傳記至圖緯方技陰陽五行算數音律訓詁篆隸之學無所不通嘗與諸儒定雅樂同胡瑗更造鐘磬而無形制容受之別卒不用

歐陽修字永叔江西廬陵人英宗治平四年以觀文殿學士刑部尙書知亳州爲郡時學者求見所與言未嘗及文章惟談吏事謂文章止於潤身政事可以及物凡歷數郡不見治跡不求聲譽寬簡而不擾故所至民便之或問爲政寬簡而事不弛廢何也曰以縱爲寬以畧爲簡則政事弛廢而民受其弊吾所謂寬者不爲苛急簡者不爲繁碎耳累乞致仕神

宗賜詔畧曰卿翊戴三朝清明朗直有言有績著在朕心重違勤求外寄藩輔邦之僑老不以遐遺所冀輸誠常在帝室而納祿與職至於再三雖潔身之風可激貪冒顧許國之義未協忠嘉姑體眷懷勉圖膺任所請宜不允卒贈太子太師謚文忠崇祀名宦

柳植字子春眞州人舉進士由翰林院學士知亳州植平居畏慎寡言笑所至官舍蔬果亦不妄採時稱其廉崇祀名宦楊繪字元素綿竹人以進士上第累官御史中丞熙寧中上疏曰老成人不可不惜今舊臣多引疾求去范鎮年六十有三呂誨五十有八歐陽修六十有五而致政陛下可不思其

故乎王安石惡之遂罷爲侍讀學士知亳州崇祀名宦

劉攽字真父與兄敞同登慶厯進士以歐陽修趙槩薦同知太常禮院論新法忤王安石斥判外州所至治尙寬平部吏不逮者務安全之後徙知兗亳二州不能奉行法令致財賦坐廢弛黜哲宗初起知襄州入爲秘書監以疾求去蘇軾范百祿等言其博記能文章政事侔古循吏身兼數善守道不回宜優賜留京師竟以疾不起攽邃於史學作東漢刊誤預司馬光修資治通鑑爲人疎儻不修威儀喜諧謔數用以招怨悔終不能改崇祀名宦

邵亢字興宗丹陽人舉茂才異等以資政殿學士厯知亳州

遇事敏密吏操辭牘至前皆反覆閱之人或以爲勞亢曰決是非於俄頃正當爾初雖煩後乃省也籍里閭惡年少與吏之廢停者一有所犯皆遷處之

馮京字當世鄂州江夏人少雋邁不羣舉進士自鄉舉禮部以至廷試皆第一時猶未娶張堯佐負官掖勢欲妻以女擁至其家束之以金帶曰此上意也頃之宮中持酒殺來直出奩具日示之京笑不視力辭出知開封會選人鄭俠上書言時政薦京可相呂惠卿讚京與俠通罷知亳州其爲郡守諸縣公事至卽厯究之苟與縣牘合而處斷麗於法者呼法吏決罪不以付獄報下捷疾一無壅滯人服其敏卒贈司徒謚

文簡今祀名宦

曾鞏字子固建昌南豐人生而警敏讀書數百言脫口輒誦年十二試作六論援筆而成辭甚偉甫冠名聞四方歐陽修見其文奇之嘉祐二年進士第調太平州司法參軍召編校史館書籍遷館閣校勘集賢校理爲實錄檢討官出通判越州州舊取酒場錢給募牙前錢不足賦諸鄉戶期七年止期盡募者志於多人猶責賦如初鞏訪得其狀立罷之歲饑度常平不足瞻而田野之民不能皆至城邑諭告屬縣諷富人自實粟總十五萬石視常平價稍增以與民民得從便受粟不出田里而食有餘又貸之種糧使隨秋賦以償農事不乏

知齊州其治以疾姦急盜爲本曲堤周氏擁貲雄里中子橫縱賊良民汙婦女服器上僭力能動權豪州縣更莫敢詰鞏取實於法章邱民聚黨村落間號霸王社椎剽奪囚無不如志鞏配三十一人又屬民爲保伍使譏察其出入有盜則鳴鼓相援每發輒得盜有葛友者名在捕中一日自出首鞏飲食冠裳之假以騎從鞏所購金帛隨之夸狗四境盜聞多出自首鞏外示章顯實欲攜貳其徒使之不能復合也自是外戶不閉河北發民濬河調及他路齊當給夫二萬縣初按籍三丁出夫一鞏括其隱漏至於九而取一省費數倍又弛無名渡錢爲橋以濟往來從傳舍自長清抵博州以達於魏凡

省六驛人皆以爲利徙襄州洪州會江西歲大疫輦令縣鎮
亭傳悉持藥待求軍民不能自養者來食息官舍資其食飲
衣衾之具分醫視診書其全失多寡爲殿最師征安南所過
州爲萬人備他吏暴誅亟斂民不堪輦先期區處粹集師去
市里不知加直龍圖閣知福州將樂盜廖思旣赦罪出降餘
眾潰復合陰相結附旁連數州尤傑者呼之不至居人惶恐
輦以計羅致之繼自歸者二百輦福多佛寺僧利其富饒爭
欲爲主守賊請公行輦俾其徒相推擇識諸籍以次補之授
帖於府庭却其私謝以絕左右邀求之弊福州無職田歲鬻
園蔬收其直自入常三四十萬輦曰太守與民爭利可乎罷

之後至者亦不復取也徙明毫滄三州輦負才名久外徙世
頗謂偃蹇不偶一時後生輩鋒出輦視之泊如也後爲史館

修撰今祀名宦

南豐一傳備載全文因其意美法良可
作政經也留心民事者固當共致辦香

蘇頌字子容潤州丹陽人第進士知江甯縣時建業丞李氏
後歲賦圖籍一皆無藝每發斂高下出吏手頌因治訊他事
互問民鄰里丁產識其詳及定戶籍民或自占不悉警之曰
汝有某丁某產何不言民駭懼不敢隱遂剷剔夙蠹以論李
定除御史裏行事落知制誥除工部郎中歲餘知婺州湖桐
江水暴迅舟橫欲覆母在舟中幾溺矣頌哀號赴水救之舟
忽自正母甫及岸舟已覆人以爲純孝所感徙亳州有豪民

婦被罪當杖以病未決每旬檢校未愈鄧元孚時爲譙主簿謂頌子曰尊公高明以政稱豈可爲一婦所給但諭醫者如法檢校彼自不誣矣頌曰萬事付公議何容心焉若言語輕重則人有觀望或致有悔旣而此婦病死元孚慚曰我輩狹小豈可測公之用心也後知開封頗嚴鞭撲謂京師浩穰當以枉後惠文治之非毫顛卧治之比卒贈司空

孫覺字莘老高郵人甫冠從胡瑗受學瑗之弟子千數別其老成者爲經社覺年最少儼然居其間衆皆推服登進士第調合肥主簿歲旱捕蝗請以米易之是民除害而享利也守悅推其說於他縣擢右正言王安石早與覺善將引以爲助

覺條奏其妄屢忤安石出爲廣德軍徙湖州治石堤長百里堤下盡化良田徙福州閩族厚於婚喪其費無藝覺裁爲中法使資裝無過百千葬埋之費減什伍民亦便之徙亳徐揚州徐多盜捕得殺人者五其一僅勝衣疑而訊之曰我耕於野與甲遇以挺與我半夜挾我東使候於門不知其他也問吏法何如曰死覺止誅其首後著爲例紹聖中以爲元祐黨奪職徽宗卽位復官有文集奏議六十卷春秋傳十五卷朱光庭字公炎河南偃師人登進士累官右諫議遷給事中知亳州召還復爲給事中元祐六年劉摯罷相光庭封還麻制言摯有功大臣不當無名而去言者若指臣爲朋黨願被

斥逐不辭於是落職除集賢殿修撰再知亳州復召爲給事中知潞州遷集賢學士卒程伊川稱其在家臨民臨事造次動靜一由至誠有蹇蹇王臣之節凜凜循吏之風今崇祀名宦

葉康直字景温建州人擢進士第知光化縣民歌其清如水平如衡後進寶文閣待制以疾請知亳州通濬積潦民獲田數十萬畝崇祀名宦

呂希純壽州人正獻公公著子登第後薦中書舍人內侍梁從政劉維簡除內省押班希純以親政之始首錄二人無以示天下持不行由是闔寺側目出爲寶文閣待制知亳州崇

祀名宦

陸佃字農師越州山陰人居貧苦學夜無燈映月讀書擢甲科授蔡州推官受經於王安石安石以佃不附已不容以政崇寧元年欲懲元祐餘黨佃爲徽宗言不宜窮治乃下詔申諭揭之朝堂讒者用是詆佃名在黨籍不欲窮治正恐自及耳遂罷爲中大夫知亳州數月卒追復資政殿學士佃著書二百四十二卷於禮家名數之說尤精如埤雅禮象春秋後傳皆傳於世本傳

曾肇字子開南豐人歷知亳州多善政

范仲淹字希文吳縣人二歲而孤少有志操旣長依戚同文

學晝夜不息食不給以糜繼仲淹不苦也舉進士第為廣德軍司理參軍改集慶軍推官後擢司諫經畧邊郡晉待制參知政事復出為經畧安撫緣邊招討使卒贈兵部尚書謚文正仲淹內剛外柔性至孝以母在時方貧其後雖貴非賓客不重肉妻子衣食僅能自充而好施予置義莊里中以贍族人汎愛樂義士多出其門下雖里巷之人俱能道其姓氏為政忠厚所至有恩邠慶二州之民與屬羌皆為畫像立生祠事之及其卒哀號如父

范純禮字彝叟蘇州吳縣人以父仲淹蔭為秘書省正字知靈臺令元祐初入為吏部郎遷江淮荆浙發運使遷刑部侍

郎進給事中純禮凡所封駁正名分綱紀皆國體之大者後轉吏部改天章閣待制樞密都承旨出知亳州提舉明道宮徽宗立知開封府命鞠享澤村民謀逆純禮審其故此民人戲場觀優歸途見匠者作桶取而戴之曰與劉先生何如遂為匠擒明日入對問何以處之曰愚人村野以不應為杖之足矣徽宗曰何以戒後人對曰正欲外間知陛下刑憲不濫足以為訓崇祀名宦

侯蒙字元功密州高密人舉進士歷殿中侍御史蔡京白其洩機事罷知亳州宋江寇東京蒙在亳州上書請赦江使討方臘以自贖帝曰蒙居外不忘君忠臣也卒謚文穆崇祀名

宦

呂溱字濟叔揚州人進士第一通判亳州精識過人辨訟立斷豪惡斂跡開敏善議論一時流輩皆推許然自貴重知杭州接賓客不過數語時曰爲七字舍人云

晁補之字無咎濟州鉅野人聰明強記善屬文王安國蘇軾一見奇之舉進士試開封及禮部別院皆第一李清薦堪館閣召試除秘書省正字出知齊州羣盜晝掠塗巷補之默得其姓名一日宴客召賊曹以方畧授之酒行未竟卽擒盜至一府爲撤警坐修神宗實錄失實降通判亳州

王欽若爲亳州判官監倉天久雨倉司以穀濕不爲受欽若悉命輸之倉且奏不拘年次先支濕穀太宗大喜手詔褒答因知其姓名寢致大用

陳師道字後山彭城人少而好學苦志素貧或經日不炊妻子慍見不恤也哲宗元祐二年詔以徐州布衣陳師道爲亳州司戶參軍傅堯俞素知其貧懷金欲餽之比至聽其議論益敬畏不敢出以蘇軾傅堯俞孫覺薦其文行起爲徐州教授改潁州蘇軾知潁時待之絕席欲參之門弟子門而師道賦詩有向來一瓣香敬爲曾南豐之語其自守如此與趙挺之爲女婿素惡其爲人適預郊祀行禮寒甚衣無棉妻假之問所從來却去不肯服竟以寒疾死

何執中字伯通處州龍泉人進士高第調台亭二州判官亭數易守政不治曾鞏至欲振起之顧諸僚無可仗信者執中一見合意事無纖鉅悉委以剴決有妖獄久不竟株連寢多執中訊諸囚聽其相與私語謂牛羊之角皆曰股叩其故不肯言而相視色變執中曰是必爲師張角諱耳詰之卽叩頭引伏後大觀中進中書門下侍郎謹事蔡京史譏之

周濤字幾道其先成都郫縣人後徙海陵慶曆六年中進士甲科歷亳州觀察推官爲政視民疾如己疾所在民愛譽之朱京字世昌南豐人博學淹貫登進士甲科教授亳州元符初官國子司業辭不拜史稱其持論端確竟以去位君子惜

之

曾悟靖康初爲亳州士曹金人破州被執抗辭嫚罵衆刃剗之妻孥同日被害

宋綬字公垂趙州平棘人幼聰警額有奇骨爲外祖楊徽之所器愛家藏書悉與綬綬母亦知書每躬自教訓以故博通經史百家文章十五召試中書眞宗愛其文聽於秘閣讀書及祀汾陰召赴行在與錢易陳越劉筠集所過地志風物故實每告止卽以奏將祠亳州太清宮以簽書亳州判官事入爲左正言後神宗召知樞密院事遷兵部尙書參知政事卒贈司徒謚宣獻綬孝謹清介言動有常爲兒童時手不執錢

其筆札尤精妙朝廷大議論多所裁定

金

烏古論德升益德路猛安人明昌二年進士貞祐三年以參知政事出爲集慶軍節度使兼亳州管内觀察使後守太原困於元兵殉節自縊妻亦自殺詔贈翰林學士

閻公貞字正之大興宛平人大定七年進士由普潤令升同知亳州防禦使以政績聞進大理卿被命校定律令多所更正今人以爲法家之祖云

粘哥荆山不知其所始正大中累官亳州節度使九年正月己丑游騎自鄧至亳鈔鹿邑營於衛真西北五十里鹿邑令

高昂霄知太康已降卽夜趨亳出衛真呼縣令楚珩約同行珩知勢不支卽明諭縣人以避遷之意遂同走亳丁未二邑皆降是日軍至亳州城下止有單州兵四百人號鎮安軍提控楊春邢某都統戴興屯已六年荆山悉籍城中丁壯爲軍修守具而大兵亦不暇攻四月擁降民而北城門閉不之知也五月縱遷民收麥老幼得出了壯悉留之民往往不肯留而遁數日城爲之空荆山遣將領各詣所屬招之并將領亦不返鎮安皆紅襖餘黨力盡來歸變詐反覆朝廷終以盜賊待之荆山以遷民爲軍蓋防之也及召外兵不至乃請於歸德得甲騎百餘兩總領統之旣至鎮安疑其謀已乃乘將士

新到不設備至夜掩殺殆盡荆山出走衛真楚珩與之馬而去州中豪貴悉被剽虜劉堅者初爲大兵守城父亳州復擒之囚之於獄楊春謀欲北降乃出之使爲宣差乙巳大兵石總管入州改爲順天府春爲總管戴興爲同知劉順爲治中留黨項軍千人戍之屬縣皆下惟城父令李用宜不降其妻子在亳春以爲質竟不屈而死春旣據州與劉堅坐樓上召副提控邢某邢剛直循理將士嚴憚之時臥病聞春亂流涕不自禁春遣人昇致之邢指春大罵春慚忍無言春欲殺荆山家邢力勸止之且令給道路費送之出城邢尋病卒二年夏四月北省成木解攻歸德春以戴興提精卒以往獨與疲

弱者守城州人王賓遂反正春渡河北遁旣而崔七斤爲亂殺王賓朝廷不得已以七斤爲節度使就其兵仗入蔡八月劉順攻亳州破之七斤爲城父令所殺未幾單州軍以州人殺其家屬召大兵來攻不能拔殺屬縣民而去旣渡河知毫人不疑復來攻州竟爲春所破是年六月宋人來攻春出降劉堅北走劉均者林慮人時爲亳州觀察判官春旣逐荆山納欵大兵脅均同降均佯應之歸其家取朝服服之顧謂妻子曰我起身刀筆仰荷上知始列朝簪又佐大藩死亦足矣今頭顱已如此假使有十年壽何以見先帝於地下乎卽仰藥而死

王賓字德卿亳州人貞祐二年進士外若曠達而深有謀畫初調蘭陵主簿辟虹縣令尋入爲尙書省令史坐事罷歸鄉里大興元年正月亳州軍變節度使粘哥荆山出走楊春以州出降旣而自以羸兵守之賓與前譙縣尉王進魏節度呂鈞約城中軍民復其州楊春遂遁遣節度使呂誥歸德以聞哀宗嘉之授進節度使賓同知節度使節度使呂誥觀察判官楊春復以兵來攻月餘不能拔卽渡河而北六月哀宗遷蔡賓奉迎於州北之高安上與語大悅恨用之晚擢爲刑部尙書世襲謀克上初至亳賓等適徵民丁負鐵甲入蔡及會計忠孝軍家屬口糧故留參知政事張天綱董之就遷有功

將士時亳之糧儲不廣賓等常吝惜軍士以此歸怨及運甲之役復不欲行會天綱與賓等於一樓上銓次立功等第鎮防軍崔復哥王六十之徒擐甲譁譟登樓天綱問曰卽欲見殺容我望闕拜辭賊曰無煩相公卽曳賓及呂鈞往市中鈞且行且跪涕淚俱下賓岸然不懼大叫曰不過殺我俱殺俱殺乃並害之節度副使魏節度判官孫良觀察副使孫九住皆被害又數日殺節度使王進進嘗應荆山之募由關道入汴京納奏賞以物不受又散家所有濟貧民以死自勵至汴以勞遷本州節度判官賜以白金亦不受一時甚稱之有李喜住者本宿州衆僧奴下宣差天興二年四月進糧入

歸得府還聞亳州王進反正制旨以喜住為振武都尉將兵三千應援是時大兵圍亳步騎十萬喜住以眾寡不敵獨與三人間道入城王進方議遷左軍林喜住不可進即以兵付喜住大兵攻八日不能下五月壬子兵退己未官奴與阿里合提忠孝軍百人至亳與諸將議遷可否以為不可當留輜重於蔡選軍扈從入聖朶就武仙軍遂入關中關中地利可恃又有郭蝦蟆等軍在西可恃五月甲子召官奴還歸德不赴再召留其軍半於亳乃赴六月壬辰車駕舟行至亳王進奏臣本軍伍不知治體如李喜住扈從入蔡則亳不守矣留治此州詔以喜住為集慶軍節度使便宜從事進領帥職七

月進死喜住先往城父督糧餉聞亂遂不敢入亳後歸宋

王鶚字百一曹州東明人幼聰悟工詞賦正大元年進士第

一人授歸德府判官行亳州城父令七年改同知申州事後

從金主遷蔡蔡陷將被殺張柔救之輦歸館於保州後元世

祖召對講孝經書易及齊家治國之道古今事物之變嘗因

見請曰天兵克蔡金主焚葬汝水之旁禮為舊君有服願賜

往祭世祖義而許之

王進金末遷亳州節度判官後以復亳州功授本州節度使

鎮防兵變魏節亨王賓俱遇害自誓以死守亳詔以集慶軍

節度使便宜從事未幾亦遇害

劉均林慮人正大間爲亳州觀察判官天興初提控楊春納
欵於元脅均同降均佯應之歸取朝服服之顧謂妻子曰我
起身刀筆仰荷上知始列朝簪又佐大藩死亦足矣今頭顱
已如此假使有十年壽何以見先帝於地下乎卽仰藥而死
李用宜正大時爲城父令天興元年石總管入亳州屬邑皆
下惟用宜不降其妻子在亳降將楊春以爲質竟不屈而死
元

張柔字德剛易州定興人仕元與金帥武仙十七戰皆捷拜
河北路都元帥宗憲時以萬戶移鎮亳州時環亳皆水非舟
楫不達柔贅壁爲橋梁屬汴堤通商賈之利復建孔子廟設

校官弟子員先是柔以連歲用兵兩淮難於運糧奏據亳州
之利從之命柔率山前八軍城亳戍之柔又以渦水北隘淺
不可舟軍旣病涉曹漢魏博粟皆不至又以百丈口爲宋往
來之道乃築甬道一自亳抵汴一自亳而南堤百二十里流
深而不能築復爲橋十五橫以二堡戍之由是糧無不達卒
贈太師汝南王謚忠武子宏範宏畧俱有威名宏範滅宋封
淮陽王宏畧別有傳

張宏畧字仲傑元帥柔子也有謀略通經史善騎射嘗從柔
鎮杞徙亳州授金虎符順天路管民總管行軍萬戶中統三
年李壇反求救於宋將夏貴貴自蘄乘虛北奪亳滕等七州

四縣宏畧率戰船遏之於渦口貴退保蘄宏畧發亳兵攻之水陸並進宋人素憚亳軍棄城宵遁追殺殆盡獲軍資不可計盡復所失地卒贈平章政事上柱國蔡國公多學善書傳本其子珪嘗勒其手書楚詞唐詩於關帝廟

賈文備字仲武邠州蒲陰人父輔任金以衆歸元文祖詔禁張柔領順天河南等路軍民萬戶卒文備襲父千戶職張柔命屯三汊口備宋兵宋以雲梯二十餘來攻文備率兵鏖戰却之復令襲父左副元帥職兼領順天路中統十一年復授萬戶領張柔所部軍駐亳州宋將夏貴知亳州無備盛引兵夾攻文備出奇兵邀擊大破之

張宏範柔第九子也善馬槊能爲歌詩以克濟南李擅功佩金虎符授順天路管民總管移大名被水租稅無出輒免之朝廷罪其專擅宏範入見曰臣以爲儲小倉何若儲大倉不如活其民則歲有恒收也詔勿問至元中以萬戶鎮亳州卒贈淮陽王謚獻武

姜大亨延祐甲寅知亳州重建州治修葺學宮樹加封碑大成殿右

蓋苗字耘夫大名元城人聰敏好學善記誦延祐五年登進士第授單州判官歲饑會他邑亦以告郡府遣苗至部以請戶部難之苗伏中書堂下出糠餅以示曰濟甯民食此并此

不得食者尤多忍坐視不救乎因泣下時宰悟凡被災者咸
獲賑擢監察御史建言皆切於時務後擬僉淮東廉訪帝曰
留蓋御史朕欲聞其讜言也以艱去服除至正初薦知亳州
修學宮完州廨有豪強占民田爲已業民五十餘人訴於苗
苗訊治豪民咸自引服苗曰爾等罪甚重然吾觀汝等皆有
改過意遂從輕擬後以陝西行御史臺中丞乞骸還里卒贈
魏國公謚文獻其學術淳正性孝友喜施予置義田以贍宗
族恂恂謙謹及至遇事張目敢言雖經挫折無少回撓有古
遺直風

伯顏薊國公脫脫之孫城父縣達魯花赤崇尚文教修飾學

宮誅凶黨勸農桑己丑春義門鄉塢下村賊眾白晝劫擄遂
率弓兵赴救至白龍廟聞賊黨又掠福甯鎮乃轉赴福寧之
水西村賊敗追之爲伏兵所襲轉奔福甯鎮境民不及援爲
賊所害後人於被難所塑像立祠祀之

王正永年人至治間爲譙縣令治尚簡靜與主簿祁防用楮
幣千六百餘緡贖貧民宅剗建尉廨

夏天亨字巨卿河間人初任夏邑歷任宿州俱有去思至正
元年爲譙縣尹伸道士李鮮德冤獄本州劉傑嘉其行誼爲
立碑於福甯鎮

明

張文弼洪武初年知亳州勸建州治學宮勤於撫字流亡復業六年改爲亳縣調知池州

蔡貴江西平樂人永樂中以進士知亳縣善於撫字士民均矢勿忘

盧試榮東陽人正統元年知亳縣重修學宮建義門倉儲粟以便賑給興廢舉頽不憚其勞除暴安良敢任其怨洵謂當代循賢之吏

徐貴福建同安人正統八年知亳縣在任有公平廉幹之稱人不敢犯以私

王瓘直隸獻縣舉人成化間知亳縣居官嚴厲明決嗣遷無

爲同知

賀思聰直隸永平人進士成化十三年知亳縣慈惠宜民以憂去服除士民伏闕乞留許之又任二年儲粟賑饑至二萬餘口去任謝遷爲撰遺愛記

胡榮浙江淳安人進士成化中知亳縣廉介有才幹振興學校卒於官

謝宥永平衛舉人成化中知亳縣辦事勇決嘗儲粟以賑饑民

彭瑀河南靈寶舉人宏治中知亳縣優禮士類賓興賢能有政聲

蘇信福建永安人進士宏治中知亳縣留心學校因亳改州調全椒縣

王沂山東滋陽舉人宏治十年蒞任通敏敢爲善決疑獄亳初改州修舉多端重建大成殿建明倫堂築壇壝治公廨作預備軍儲等倉儲粟五萬石歲饑躬親賑給有王文恪鑿亳州興造記

劉甯山東高苑縣舉人宏治中治亳州謙厚愛民政多平易爲徽人強占民田事奏辨被逮旋釋復任

王番陝西朝邑人進士宏治間任戶部主事降阿迷州同陞和州調任亳州政尚平恕不拘細行陞蘇州府同知

張思齊湖廣蘄州人進士正德中知亳州素性廉介才政甚優時楊虎作亂捍禦有方城池獲固崇祀名宦

顏木湖廣應山人正德甲戌進士知亳州修建學校禁遏豪強時有武紳爲暴境內發其奸私置之於法闔郡震懼尤長於文學與薛考功時有倡和見藝文崇祀名宦

戴時弁浙江臨海人進士嘉靖間知亳州興學愛民嚴捕盜賊借任未久

金葆浙江麗水舉人知亳州存心仁愛民有去思碑

聞嘉言浙江甯海人舉人知亳州好文學多善政淡於榮進有高邁之風

王嘉相河南舉人嘉靖中知亳州居官平易近人民頌其德
吳必學福建延平人舉人嘉靖中知亳州陞九江府同知民
思其德於去後立生祠碑文稱其慈祥愷悌簡靜柔嘉百姓
不忍欺犴獄無濫繫賦役除積弊有古循良風祀名宦

張挺四川涪州舉人嘉靖中知亳州臨事機敏聽斷立決鋤
強扶弱案無留牘時東南戎馬之擾亳疲敝不支挺從容應
付事辦而民不告勞以其餘力修葺廢墜煥然聿新百姓德
之與前任吳必學並祀惠政祠今祀名宦

沈蒸浙江桐鄉人進士萬曆中知亳州居官明察才足任重
後官至巡撫州人立祠祀之碑文備載其績

劉漢書山西蒲州舉人知亳州賦政平簡居官不抗不阿以
細事被議歎曰一行作吏非余志也去之日遮泣載道

馬呈鼎湖廣京山舉人萬曆中知亳州培植學校闡揚濶德
爲政以士風民俗爲務至釐剔奸弊勤飭吏事尤推整肅

劉裔廣東舉人萬曆中知亳州賦性愷悌坦白爲治去之日
士民有送至百里外者

趙應坦直隸完縣舉人崇正中知亳州剛方有威畧吏胥不
敢欺至視百姓則霽顏相接如父母然民尤愛其寬猛得宜
葉景先江西餘干舉人知亳州禮以優士慈以撫民任亳八
載愷澤洋溢及流寇圍亳率眾三戰賊遂城全羅萬藻有公

齋紀事序載藝文州人爲建葉公祠

何燮字中理號潯江福建晉江人舉於鄉任靈川桂東二縣有政績崇正中知亳州州自八年後寇賊交橫益以饑饉民死徙過半燮盡心拊循營戰守具甚備未幾山東河南土賊迭至燮戰盧家廟生擒賊魁二人刳腸示眾撫降者數千人十五年四月十五日李自成陷亳執燮欲降之罵不屈斷足剖胸而死懸首市上三日眼鼻猶動賊懼之遂去吏目王隆斗殮葬城外事達於上贈太僕寺少卿謚忠壯蔭一子入監國朝定鼎後通亳士民以燮忠愛義烈比美睢陽呈淮入祀名宦忠義兩祠有燮後人仕於須江來亳省墳勒石於墓之

原墓在東關外東南城址城上卽奎星樓

宋應星江西舉人知亳州值兵變之後官署悉被寇燬捐橐更新招集流亡又買城南薛家閣將建立書院於其所惜志未就而去亳

張淮浙江鄞縣人監生宏治十年任州同知佐知州賑濟饑民捕獲盜賊厯著勞績

王廷相字子衡河南儀封人進士正德二年由給事中謫亳州判官持法嚴明士民竦畏廷相博學好議論以經術稱凡星厯輿圖樂律河圖洛書及周邵程張之書皆有所論駁隆慶初贈少保謚肅敏

楊威陝西人監生任亳州判官治事明決尙安靜尤重學校
萬夔江西新建人進士嘉靖十三年由御史降亳州判官任
事有爲尤培植學校

傅榮直隸清苑人文毅公珪之子蔭授中書舍人嘉靖中謫
亳州同知勸學興禮修理城垣倉廩厯著勞績

趙墳字平仲浙江餘姚人進士由戶部員外郎謫亳州同知
閱靜自守官舍蕭然

王廷字子正四川南充人進士嘉靖間由御史謫亳州判官
氣宇冲和政尙安靜能以文學飾吏事厯蘇州知府有政聲
比之趙清獻直節勁氣終始無改轉都御史戶部侍郎後因

高拱徐階相傾軋廷右階發拱黨張齊受賂事拱起再相廷
被劾爲民嘉靖十六年詔復故官致仕卒謚恭節

諸暉浙江餘姚人進士由刑部員外郎謫亳州同知長厚謹
守卒於官

胡賓字汝觀河南光州進士嘉靖間由給事中謫亳州判官
任事不避難吏畏民懷尤善誘後學

郭璋直隸監生任亳州吏目爲人公正任事盡力雖居卑官
存心不苟

羅材江西廬陵舉人任亳州學正文學優長行誼修潔仕至
刑部郎中

姚溥襄城縣人歲貢生任亳州訓導風節皦皦士望攸歸

陳學乾廣東揭陽舉人任亳州學正讀書潔己不干有司

錢岑浙江鄞縣人歲貢生任亳州學正廉退自好培扶士氣

黃元福建漳浦人歲貢生任亳州訓導潔已愛士來見者懷

刺直入弗稽也其貧者更能周之及卒於任身外無餘物

桂茂林浙江舉人隆慶年任亳州學正夙著文名品行端潔

詹軫光徽州婺源縣舉人任亳州學正清曠絕塵無寒儉態

後官知府清名第一

楊惟寅號天門武進舉人任亳州學正高誼達節一時推重

戴士憲南陵舉人任亳州學正高風達節有稽阮風

賀曰尊字仲淹丹陽舉人天啟年任亳州學正在任捐修學

宮又助理修築城池凡存學公項出入不苟士民感悅刊載

其行於石

馬雒圖通州歲貢任亳州學正值亂能軫恤士子

王隆斗籍貫未詳任州吏日闖賊破城後殄餘暴撫遺黎毫賴以

安盧見曾撰曰王君隆斗明崇禎末年亳州之吏目也籍貫俱不可考緣時值亂亡毫兩遭焚殺文獻俱盡所餘二三

野人但知有王四爺之稱嘗曰王四爺最愛我亳民我鄉人

今日尚得生者皆其誘賊殺賊以存活我鄉人者也州明經

張純夫謂余曰吾少時嘗聞鄉父老談及王吏目沒賊事崇

禎甲中之變吳三桂請本朝兵討賊賊奔旋西毫不為備復遭狼籍拆城之日知州何變死之吏目以在外不與難當是時本鄉土賊房文字高見寰聶三虎等乘機入城焚掠荼毒比流賊倍甚及吏目旋日見城破官死已屬無及而土賊之勢方瀦乃喟然曰吾縱不能退流賊以全城又安忍見土

一守少元 卷一
賊之橫害乃爾耶顧孑然一身莫可誰何乃伴與賊為謀畫
吏目平日信義服人羣賊倚重之未幾賊自相攜賁遂起爭
奪吏目又伴為和解使攻殺不匝月而房文宇等俱斃盡
無一存者此所謂以賊誅賊不煩一兵而地方甯堵者也本
朝定鼎時吏目不知所終或以為殉難云遺跡苦無考據
州城隍廟中有一碑記載王四翁名目亦不詳其名貫其碑
所載乃吏目為道人修廟并出贖田增置田產之事里人
感其事而誌之夫以吳公之治行第一漢史尚且失名至今
歎想之下猶有吳公在也王吏目為民除暴遺惠於毫者甚
鉅若不表而誌之千百載後又安知有殊績之王公也哉

戴允登亳州人即任城守備崇禎七年正月十七日流賊寇

毫允登率士民固守全城

國朝

秘應奇順天舉人知亳州當兵火之後凋敝殘燬能撫集流
亡禮賢賓老興學勸農地方漸有起色去之日士民攀留勒

其治績於石

嚴自泰福建人順治壬辰進士蒞任勤於撫字剔除積弊始
毫各里分養驛馬愚懦往往以此破家遂據呈力請於上始
歸官養民困以蘇兵荒之後城垣盡圯學宮門廡盡沒制榛
自泰以次修葺城垣完四之三而學宮之戟門兩廡具舉又
建奎星閣於左口口之冬海逆逼城撫循固守安全無恙尤
有捍衛之功

劉澤溥陝西華州人進士知亳州在任實心任事仁風惠政

吏民懷之延州紳高搏九修葺志書尤有功於文獻

楊國柱奉天監生康熙初知亳州在任鋤奸戢暴有守有為

聽斷精明有青天之譽康熙十三年大兵過亳一切支應無
絲毫擾累地方親行護送官軍至蒙城蒙父老懇請代爲護
送出蒙界一時義聲仁政騰於遐邇祀名宦

朱之璉奉天人康熙三十一年任亳州才長政敏治有餘閒
修舉廢墜葺理學宮倡建城東奎星樓尤善體恤貧民散給
牛種賑貸有方在任六年以盜案累誤離任亳人乞留再任
十年遷安慶府同知四十八年亳州大饑奉委辦理賑務設
法補救饑民遍沾實惠又倡捐衣藥全活甚多旋陞宣化府
知府雍正間以前明裔得世襲侯爵祀名宦

蘇顥宛平人康熙四十六年任時亳連年荒歉請賑捐粥寢
食不遑民賴以生歲旣登盡心撫字與民休息民賴以安在
任十八年政因時出治尙和厚士民懷其德勒碑北關之講
院輯其舊案撰治箴傳譜志實也卒於官士民留之葬兩河
口以祭文勒諸石復於講院設位春秋祀焉

余光祖字念峯隸爲人進士好學工文章任漣水知縣雍正
六年蒞亳廉以持已勤以綏民數月民皆安堵翕然感之
世宗憲皇帝加意人材令州縣各保一人光祖承檄詳慎召
諸紳士集明倫堂諮訪公議得貢生孫國柱薦之後以稱職
聞復以亳俗不知讀書好勇鬪狠思有以移易之每於讞獄
時誥誦導以禮讓儆以身命未及暮年而亳境姦民私鑄事

發遂望議禍且不測時孫國柱適以薦引見

上詳問之國柱爲備陳始末得從未減初光祖令漣時詳革管圖民立碑識其德及蒞亳被議漣人將赴總督陳情借寇光祖聞急以書止之復爲詩答其意乾隆元年歸卒於家所著念峯制藝志遠堂詩集等行於世子臺戊午科舉人官博野縣知縣亦有政聲

華度字可含號研齋浙江餘姚人以薦授金壇知縣移亳州知州爲政以教養爲先初下車肇興柳湖書院捐俸延師徒肄業其中月課不倦乾隆四年大水秋禾盡沒大橋及兩岸民房並逐渦流度悉心救護履畝親勘力請賑濟民賴以生

修亳州志十六卷

朱辰字巽齋江甯縣諸生以居家孝友才識敏幹薦授大湖縣知縣遷懷甯所至有聲以卓異薦擢亳州知州下車除陋規公坐竟日吏胥家人不得夤緣爲姦利事聽訟片言而折無留獄數月頌聲載道民賀得神君焉本府知府西人也州之典商以鄉里干之檄加息辰持不發知府怒按州示以辭色佯不喻知府復治其吏辰往請之拒不見辰亦怒召諸商人謂之曰成例可守奈何復加息以病民乎今與若約願如舊者卽具甘結不者速移他所毋在此累吾民也諸商氣懾卽昇筆札使具結狀公以結覆府議遂寢其廉幹愛民類如

在任重修大橋便行旅歲凶加賑悉慮殫心使饑民有濟捐俸製水車禦火災捕蝗身先徒役人咸稱之治亳二年政聲四達上官重之題直隸六安州未赴丁內艱去民思之爲立祠分司街服闋憲官至江西撫州府知府

楊遵時字養晦陝西三原人以進士爲太和知縣政聲蔚起四野謳歌鄰邑慕爲樂鄉移亳州知州聲稍減於治縣時緣亳五方雜處雅欲以靜鎮之人不覺也蒞亳五年清苦如寒素以疾卒於官民始思之久而不忘至今猶有稱之者李天璽奉天人以知縣署亳州善折獄聽訟片言而折民自以不寃數月去民至今思之

張肇揚山東莒州人乾隆三十二年知亳州剔除積弊寬猛並用民間有祝有詛其祝者鄉村農民訟獄卽爲伸雪無災累之苦其詛者奸猾胥役有過卽懲無絲毫庇護竟以逃犯鐫級去後改授潁州府通判升壽州知州卒於官

孫維龍字雨髯宛平進士乾隆三十四年以黟縣知縣署亳州清慎自矢好讀書工詩數接見儒生夤緣之徒不能干以私在亳年餘士民愛戴會以計薦入都作詩留別有句云百城但許書爭富一事堪誇客賀貧非虛語也後改發四川解餉入軍營木果木之役文職官僚死事者二十有六人維龍與焉奉

旨優恤蜀人築祠於成都浣花草堂之右額曰慰忠

江恂字于九儀徵拔貢生乾隆四十二年任亳州發奸摘伏

民不敢欺四十三年河決儀封考城壞永清大橋兩岸廬舍

漂沒者數十萬間每見水勢洶湧溺死者隨流下輒泣曰此

余之不德苦我民耳因以已之袍帽并四門匾額擲之中流

以示身甘陷溺為民請命之誠百姓見之無不感動凡請賑

捐粥修堤護城皆盡心籌畫四境卒賴以安至今父老猶有

能道之者泗州知州張佩芳州舉人馬文瑋皆有江公救災

記刻石

李廷儀號石帆直隸灤州舉人乾隆五十七年以懷甯知縣

知亳州性耽吟咏有杏瓊齋詩集行世滁州張葆光懷甯潘

英諸詩人皆從之遊并為之刻詩州人孫元煌吳灝詩集亦

為之捐俸刊刻焉政尚寬平不事苛刻凡事皆約己裕民即

賠累鉅萬不恤也在亳凡四任其將二十年後以疾卒於官

穎州府教授馮錫宸贈以聯曰大手筆千秋不朽好心腸萬

姓皆知人咸以為寶錄

溫定瀾廣東程鄉人任亳州同知好讀書多著作

張繼齡湖南祁陽人任亳州同知善書法

顧登江蘇新陽人任亳州同知故係世族多書籍與之交者

每以其先世書籍贈人所刊正音四書尤有裨於學者

杜芾大興人爲亳州同知同知之職督鹽課備任使民辭所不得問也善是職者稱仕隱焉芾清厲自持循分供職之外斗酒自勞淡如也至於姦胥猾役及市井打降之徒攫之必盡法以懲無所避忌在任數年橐無餘資卒於官

凌榮字香雨浙江會稽人嘉慶二十三年任亳州州同性倜儻不羈工詩善書好與儒士相往還後署潁州府同知卒於任

秦錫蕃南陵舉人任州學正知州嚴自泰修葺學宮董率襄贊募捐之外以俸助之分校亳州志蒐輯維勤序文一首頗以北關商賈雲集百貨輻輳而墉堡未備爲虞蓋鑒於前代

兵燹之慘亦老成之長算也秉鐸者能存是心豈非出於書卷之氣乎

劉光允江甯人歲貢任州學正清矯自好一介不苟士民共欽

萬國字允人號雲坡南陵拔貢生康熙二十五年以教習授亳州學正端方和易教士有方附學民居皆學中餘地也聽居人種植霑其恩者尤多康熙四十三年遷鳳陽教授民泣送之立德碑於學前其辭曰公蒞學二十年恩德多端小民筆不能文難於盡述謹勒台銜於石永傳厥德不忘觀其辭可以徵德矣後卒於官子方涵入亳籍歲貢生官福泉縣訓

導

劉科字孟川武進人以舉人官亳州學正秉性鯁直學以不自欺爲主飭躬訓士一本此意乾隆年學使者將按穎亳武生某忤府通判知府怒以二生爲劣授意學正令舉報科持不可且爲請焉知府面促之對曰二生實無劣蹟非敢袒護也出曰府尊以怒舉劣當自舉耳吾安能殺人媚人乎會學使者待士寬又以學正持之力遂寢其事後以年逾七十將告歸且以歲大計當叩謁上官喟然嘆曰老病人扶再拜難豈能行折腰乎卽日以老請作滿江紅二闕見意一時和者甚眾行之日送者載途挂帆去乃已在亳時寡交遊意所不

可不數數見也獨許歲貢生張慶時相過從而兩人皆重聽其憑一几據紙筆作問答竟日談不倦以手爲口以目爲耳旁人見其搖筆不已竟不知所談何事也興至輒索酒飲醉卽曳杖去肩輿藍蓋時不及待云

王萬年宣城舉人任亳州學正讀書潔己一介不輕取與尤能培扶士氣

施灝號荃漁江蘇寶山人以拔貢授亳州訓導文行並懋端己範士辛卯科與州人董治張琴同舉於鄉壬辰成進士改授河南武安縣知縣性真摯事嫡母以孝聞事伯兄若嚴父幼卽工詩有寶山十子詩抄默雷軒詩集行世

李晉埈揚州興化舉人爲亳州學正勤於課士談藝之外惟編籬種菊學宮有頽廢者無不倡率興脩在任二十六年沉靜端嚴無忝師範後升徐州府教授去之日以詩四章留別有惓惓之意焉其三子偉言留寓於亳

甘繩典蕪湖舉人爲亳州學正年已六十餘矣性質樸不拘小節毫尤好學弟子進謁者不問贊而問業尤好獎勵人有一材一藝皆極口稱贊之在任三年卒於官

童鼎臣合肥舉人爲亳州學正邃於學一時從遊者甚眾後以病卒於官

任壽世字霽峯錢塘人道光中兩任亳州修隄防濬畎澮輯志乘皆闕爲政大體以其餘力修葺廢墜如文昌宮等處煥然一新士民不忘其惠

徐青照字穉蘭順天進士道光中知亳州獎士行崇節孝興水利除水患歷鳳嶺道

舒夢齡字蘇橋湖南澱浦進士任亳州勤儉自勵不欲以尊貴臨士民一時文采風流實牧令中之僅見者赴任詩曰入境無煩喝殿迎騎驢一路看春耕千家烟火如雲密萬頃田疇似掌平父老未知新刺史衣冠猶是舊書生衙前胥吏曾堪笑向我曉曉問姓名讀其詩如見其人累升鳳陽府知府廬鳳道

龔裕字月舫清河人由庶吉士知亳州政尙寬平甫下車訪利弊知治水爲急務濬包河疏諸溝東南百里歷年無水患者裕之力也至於修城垣建義學設賑局躬親監視善政甚多累升兩湖總督

文廷杰字鍾山四川進士道光中知亳州倡捐設粥廠以濟水災濬河修城以工代賑會剿碭山等處土寇擢任六安直隸州知州

謝綸梅道光二十三年代理亳州亳有水災傾囊以賑多所全活以廉惠稱

郭世亨字梅卿浙江蕭山人大興籍進士由庶吉士出知亳

州政尙寬簡遇爭訟者諳諳勸諭而民亦樂從之又修講堂勤考課重優獎以振興文教爲已任未幾丁內憂去官採訪冊史丙榮字穎生江蘇江都進士道光二十七年署亳州案無留牘民無遁情建義倉未竣而卒

馬新貽字穀山山東荷澤進士咸豐元年攝亳州決斷如流公餘與諸生論文講經帶兵擣義門集鄧鴨賊巢擒之官至兩江總督卒謚端敏

張文彬字浣江宛平人咸豐三年署亳州時土匪蠡起甫抵任竟晝夜搜捕賊衆逃散旋調合肥縣計在任三十一日歸署宿食僅四日耳文彬去未匝月捻逆大熾遂不可遏是年

文彬殉合肥難亭人哀思之

孫椿號蘭圃浙江山陰縣副貢生以州判分發安徽咸豐三年三月代理亳州得民心爲百姓稟留改署任知金陵粵逆有北窳之勢乃馳稟請兵守城一面集團練守陴備子藥餽糧詎五月初三日粵逆到圍城山西大同兵潰於河北公知城不可守麾民避之尙有忠義民團巷死戰之公卽將印信託交幕友沈君次衡埋於後園中識之曰吾當以死殉之而國家名器不可污賊手卽朝服坐於大堂待之初四日賊破城入署見公危坐罵不絕口牽於頭門外戕之遍體鱗傷其幕友族人孫平山亦同日殉節後經沈君次衡邀地方紳士

殯殮靈柩送回浙中

劉然號乙齋浙江山陰縣人部選亳州吏目政聲卓著緝捕勤能藏書富好學不倦課兩子讀書其長子芬七八歲卽喜讀孝經聽人談忠孝節烈事則靜聽欲有默識者公知粵逆破安慶北窳亳州戒嚴雖有山西大同兵至駐城外見賊旗卽潰都干州同皆避之公誓同印官以死殉之迨咸豐三年五月初四日城破公乃朝服冠帶自刎于公堂賊見公袍肌血染通紅亦未加害其妾高氏自縊於上房長子芬次子芳同日被戕於三堂使女春蘭亦縊於床迨初六日賊去育州幕沈君次衡名鈞者來看視收殮殯公及妾並二子使女子

州之東門外自在園半里許浙江義地內事聞於

朝給雲騎尉世襲有州墓石他山作墓誌刻於墓可謂臣死忠妾死節子死孝婢死義誠忠孝節義萃於一門至今尤膾炙人口樂與稱道其事

博銘字地輔漢軍正藍旗人咸豐五年知亳州招流亡繕守具捻賊圍城與總兵朱連泰固守經旬乃解自城東北築外城至西北凡六里民以安堵支應過境官軍毫不擾民父憂亳州人願留在任守制後升潁州府卒

李孟荃字紫佩固始人同治三年由廕生知亳州時軍務初平孟荃培城垣清保甲嚴扞擷課書院送科費毫人蒸蒸向

化得孟荃培養之力居多

鐘泰漢軍正藍旗人舉人同治八年代理亳州時有教匪以邪術擾民民大譁相驚以走泰嚴緝獲渠魁二人誅之餘免株連民情翕然患亦寢熄

李炳濤字秋槎河南河內人順天附生改捐本籍監生由軍功知縣同知銜同治四年奉委查辦亳州民圩初下車按戶點名除識投誠之年貌里居估終被控者立擒置諸法雖豪貴無少貸時大兵之後繼以凶歲而民不敢爲草竊者善後之力也後以知府代理州事尋署潁州府知府授廬州府知府加鹽運使銜歷任府州縣皆有實惠及民士民頌之政績

宣付史館


秦馥字海庵常州人咸豐五年同知亳州性廉介時有地主以當價不足訟當主當主行賄於馥求禁地主永不復價馥拒不納及訊地主泣訴馥謂當主盍復價當主辭以窶馥曰盍以賄吾之錢復之乎當主語塞案遂結署自是無訟胥吏盡散僅役一僕一自隨日斷炊邑人稍周之始免餒



汪昌善字穀原霍山舉人授亳州學正性沖淡不染俗塵自題楹聯云冷署亦藏春任他細草縈階雜花滿徑閒官聊養拙容我三杯邀月一榻眠雲

王文勳字宏圖懷遠舉人署亳州訓導通經術能文章邑人

多從之學

沈照離字寰周合肥貢生署亳州學正文行並粹勤考課丹黃甲乙人服其能與諸生往來非其人輒拒之不少假





皇少元

卷一

